

fasnachtsruggblig 2014

wär baseldytsch nid duet verstoo,
stoot uff und duet dä tisch verloo,
wel es bestoot die grossi gfoor,
das me uns verstoot, erscht aendi joor.

fir d fasnacht z basel an mym rhy,
vier walliser kemme äxtraa derfiir am brie,
drey dääg, kenne si ruesse und au drummle,
drey nächt, numme ruesse und nid fummle.....

wenn e jääger goot go jaage,
muess är dehaime aadjee saage,
är het hitte aine uff dr lyschte,
fir dä, kunsch grad zää daag in kische.
im wallis gheert me saage,
alles wo sich bewegt, das muess me jaage,
e knall, e hirsch, wo jezze dood isch,
het nid gwisst, dass är no im wallis isch.

*wenn in kandere d golfer runde draie,
duet der felix deert dr raase maye.*

e fasnacht mit neie lyt - isch wundervoll,
alli s glyche goschtym, das wär scho toll,
do derzue bruuchts neyi limpe und au grinder,
numme usgsee welle mir nid - wie kloonti kinder.

**bi spyys und drangg, hän mir beschproche,
es muess e fisch si, ain us numme knoche.**

*wenn dr robi duet e umgang blaane,
laufe mir gwiis an e guugen aane.*

**d piranhas sin schynts gladdi sieche,
me het s gfyyl die dängge wyter, als numme bis uff rieche,
aine duet im schwarzwald wandere,
ain probiert mit golf im dytsche kandere,
e andere bidryybt e gschäft, nit wyt vo unserer gränze,
kai angscht, es isch kain vo dääne mit de ränze,
schwyzerfränggli dien mir iiber gränze bringe,
fir zem ässe und au dringge, im baadische efringe,
aine schwärmt vo hamburg und st.pauli, mit gekigge,
und jezz no e larve us lörrach, vom gerd paulicke?**

*dr vortrab mecht e waggiswaage kaufe,
fir das mien alli zer kasärne laufe.....*

**s isch nid aifach gsi, e larvemacher z finde,
in basel dien sich alli winde,
kain het welle, kain het muet,
schappo – gerd – mir ziehn dr huet.**

**mit minere larve in dr hand, stoo ych jenze uff dr pfalz,
e uusbligg, draumhaft – uns zwai gfallts,
luegsch iibere bach, gseesch s scheene noochberland,
au wenn mi larve, numme so am rand,
gebore isch im dytsche land.**

*me mecht e ziibeleebreetli ässe, ych ka das verstoo,
fir das muess me aber basel nid verloo.....*

**wenn d piranhas dien e pause mache,
fir dass me ka e pippi mache,
luegsch linggs, luegsch rächts und luegsch au hinde,
kasch wyt und breit kai fasnacht finde.**

**als glaine gniirps – ych ha s scho fascht vergässe,
wenns guet isch gsi, das ässe,
gseet mi täller uus wie gschläggt,
ich ha deert scho gsait – RYYS und FISCH - das passt perfäggt.**

habe fertig - proscht